

妙法蓮華經如來壽量品第十六

自我得佛來 所經諸劫數 無量百千萬 億載阿僧祇

常說法教化 無數億衆生 令入於佛道 爾來無量劫

爲度衆生故 方便現涅槃 而實不滅度 常住此說法

我常住於此 以諸神通力 令顛倒衆生 雖近而不見

衆見我滅度 廣供養舍利 咸皆懷戀慕 而生渴仰心

衆生既信伏 質直意柔軟 一心欲見佛 不自惜身命

時我及衆僧 俱出靈鷲山 我時語衆生 常在此不滅

以方便力故 現有滅不滅 餘國有衆生 恭敬信樂者

我復於彼中 爲說無上法 汝等不聞此 但謂我滅度

我見諸衆生 沒在於苦海 故不爲現身 令其生渴仰

因其心戀慕 乃出爲說法 神通力如是 於阿僧祇劫

常在靈鷲山 及餘諸住处 衆生見劫盡 大火所燒時

我此土安穩 天人常充滿 園林諸堂閣 種種寶莊嚴

寶樹多花果 衆生所遊樂 諸天擊天鼓 常作衆伎樂

雨曼陀羅華 散佛及大衆 我淨土不毀 而衆見燒盡

憂怖諸苦惱

如是悉充滿

是諸罪衆生

以惡業因縁

過阿僧祇劫

不聞三寶名

諸有修功德

柔和質直者

則皆見我身

在此而說法

或時爲此衆

說佛壽無量

久乃見佛者

爲說佛難值

我智力如是

慧光照無量

壽命無數劫

久修業所得

汝等有智者

勿於此生疑

當斷令永盡

佛語實不虛

如醫善方便

爲治狂子故

實在而言死

無能說虛妄

我亦爲世父

救諸苦患者

爲凡夫顛倒

實在而言滅

以常見我故

而生憍恣心

放逸著五欲

墮於惡道中

我常知衆生

行道不行道

隨應所可度

爲說種種法

每自作是念

以何令衆生

得入無上道

速成就佛身